

Stoffel na ceda betg e protesta fin tar l'UBI cunter la «Rundschau»

L'istanza independenta da recurs davart radio e televisiun tracta il cas

DA CLAUDIA CADRUVI / ANR

■ L'investur Remo Stoffel sa dosta cunter la «Rundschau». Lezza aveva rapportà davart reservas zuppadas che n'erian betg enconuschentas il 2012 cura che l'investur ha acquistà la Terma en Val S. Pieder. L'UBI tracta il venderdi proxim il cas. Las tractativas èn publicas. I n'è betg l'emprima istanza che s'occupa da la chaussa. Immediat suenter l'emissiun dals 9 da mars 2016 ha Stoffel protestà tar il post dad ombuds: La contribuziun da la «Rundschau» saja stada en plirs regards nuncorrecta ed haja violà il princip d'objectivitat. L'um dad ombuds Roger Blum ha renvià il matg la protesta: Il publicum na saja betg vegnì manà davos la cazzola. Stoffel ha tratg vinavant la chaussa tar l'UBI, l'istanza independenta da recurs davart radio e televisiun.

Las renfatschas da Stoffel

En la contribuziun da la «Rundschau» crititgescha ina grupp da burgais da Val S. Pieder il pretsch da vendita per la Terma. Tenor ina nova expertisa d'ina «renumada societad fiduziaria» hajan existì reservas zuppadas da fin 15 milliuns francs. Il pretsch da 7,8 milliuns per la Terma saja perquai stà bler memia bass: La valur cudeschada avess cumportà 17,8 milliuns, la valur assicurada 73 milliuns. Stoffel ha pudì prender posiziun en in'intervista cun la moderatura Susanne Wille.

Visavi il post dad ombuds ha Stoffel suenter fatg valair che la «Rundschau» haja manà sappientivamain en err il publicum: Ina persuna privata haja laschè far quest'expertisa, betg la grupp da burgais. Insumma na saja l'expertisa betg objectiva e betg fatga d'in fiduziari neutral.

Plinavant na saja quai betg stà correct da sugerir ch'i haja propi existì reservas da 15 milliuns. Autras expertisas, per exempel dal chantun, haja la «Rundschau» ignorà. Ins n'haja betg fatg menziun ch'ins haja tschertgà diesch onns adumbatten in cumprader. In'ulteriura reproscha: Avant l'intervista haja la «Rundschau» empermess da betg discurre davart «istorgias veglias». En l'intervista haja la moderatura lura tuttina



Remo Stoffel sa dosta cunter l'emissiun «Rundschau» tar la UBI.

MAD

menziunà la razia dal 2011 da l'administraziun da taglia pervi da suspect da fraud da taglia.

Intginas passaschas difficilas

«Tut en tut na vesel jau en la contribuziun ed en l'intervista intginas passaschas difficilas, ma jau na sai betg constatar ch'il publicum fiss vegnì cugliunà appartegnent ils fatgs», scriva l'um dad ombuds en ses parairi. El suonda per grond part la posiziun da la «Rundschau» che sa giustifitgescha cun l'argument che Stoffel haja la finala gi la chaschun da prender posiziun tar la critica.

«Tgi che vegn attatgà survegn la pussaivladad da replitgar a moda extendida», descriva Blum il concept da la «Rundschau». En trais puncts laterals n'haja la redacziun dentant betg lavurà a moda conscienziusa. I saja numnadamain propi stà ina persuna privata che haja laschè

far l'expertisa, la grupp dals burgais haja mo pajà l'expertisa. Plinavant fissi stà inditgà che la «Rundschau» avess fatg attent a las autras expertisas ch'èn vegnidas ad autras conclusiuns appartegnent la valita da la Terma. Lura haja la moderatura menziunà las «istorgias veglias» malgrà ch'ins era sa cunvegnerà da betg far quai.

I sa tractia qua dentant da puncts laterals che n'hajan betg sfalsifitgà l'impressiun generala per ils aspecturs, concluda Blum.

Il proceder tar l'UBI

Il proxim venderdi vegnan las renfatschas da Stoffel puspè tratgas a strada avant la segunda istanza. L'UBI vegn presidiada dapi in onn da Vincent Augustin. Las tractativas publicas cumenzan a las 14.00 en la stanza da conferenza da l'administraziun d'alcohol a Berna. Ins po laschar reservar plaz.